

# **Ala xa masenyi**

## **Annabi Pɔlu naxan seɓe**

### **Efese danxaniyatɔe jama ma**

### **Masenyi nde yi Kitaabui xa**

### **fe ra**

Yi Kitaabui findixi bataaxe nan na Ala xa xεera Pɔlu naxan seɓe danxaniyatɔe jama ma naxee nu sabatixi Efese taa kui nun a rabilinyi. Temui dangixi, Pɔlu nu bara kawandi ti naa alako mixie xa danxaniya Isa ma. A lu ne na taa kui han je firin. Fe naxee dangi Efese na waxati bun ma, e seɓexi Isa xa Xεerae xa Taruxui kui, Sora 19.

Pɔlu yi Kitaabui seɓe temui naxe, a nu saxi geeli Ala xa masenyi kawandife ma. Ala Xaxili Seniyenxi naxa masenyi fi a ma naxan findi yi Kitaabui ra.

Alɔ a to Efese danxaniyatɔee ralimaniya, a lonni fi e ma, yi Kitaabui noma fe gbege masende won fan be. A Ala sago makenenma won be a naxan nakamali a xa Mixi Sugandixi Isa saabui ra. A sago na a ra mixi birin xa no kisi sotode Isa xa serexe saabui ra. Yi Kitaabui a masenma won be a mixi yo mu na naxan xa wali fanyie noma a rakiside. Mixi kisima Ala xa hinne nan tun saabui ra. Yi Kitaabui man a masenma won be a danxaniyatɔe jama tide gbo Ala be. A bara wali so e yi ra, e xa nu na raba han beenun a man fama e foxo ra loxo naxe. A bara fe fanyie masen, a lanma danxaniyatɔee xa jere naxee ma. A man bara fεere fi e ma e xa

no tide Sentane kanke alo geresoe tima a gerefa kanke ki naxe.

Yi Kitaabui xa masenyi senbe gbo ki fanyi. Ala xa a rasabati won sondonyi kui. Ala xa a Xaxili ragoro won ma naxan lonni fima, naxan fee makenenma, alako won ma Ala kolonyi xun xa masa. Ala xa senbe fi won ma won xa lonni soto a xa Mixi Sugandixi xa xanunteya ma naxan dangi lonni birin na. Ala xa won nakamali a xa fe kamalixi birin na. Amina.

## **Ala xa masenyi Annabi Polu naxan sebe Efese danxaniyatoe nama ma**

### *Xeebui*

<sup>1</sup> N tan Polu nan yi ki, Ala bara a ragiri naxan xa findi a xa Mixi Sugandixi Isa xa xera ra. N bara wo tan Efese seniyentoe xeebu, Ala xa Mixi Sugandixi Isa xa danxaniyatoe. <sup>2</sup> Won Baba Ala nun won Marigi Isa Ala xa Mixi Sugandixi xa hinne nun bojesa fi wo ma.

### *Ala matoxe*

<sup>3</sup> Tantui nan Ala be, naxan findixi won Marigi Isa Baba ra. Isa saabui ra, a bara barake birin nagoro won ma, naxan mooli mu kelima yi dunija ma, naxan mooli mu toma, naxan won malima ariyanna kira xon. <sup>4</sup> Beenun dunija geme singe jan xa doxo, Ala nu bara won sugandi Isa saabui ra alako won xa seniyen, won xa tinxin a ya i. A xa xanunteya kui, <sup>5</sup> a naxa janige tongo won xa findi a xa die ra a xa Mixi Sugandixi Isa saabui ra, Ala sago fanyi ma. <sup>6</sup> Na

birin nabaxi ne alako won xa a xa hinne xungbe matoxo, a naxan masenxi won be a xanuntenyi Isa saabui ra.

<sup>7</sup> A tan Isa bara won xunsare fi a yete wuli ra. Won ma yunubie xafarixi a tan nan saabui ra. Na birin nabaxi Ala xa hinne makaabaxi nan kui, <sup>8</sup> a bara naxan fi won ma a yiriwaxi ra, lonni nun fahaamui ra. <sup>9</sup> A bara a sago gundo makenen won be, a to wa a xon a sago xa raba a xa Mixi Sugandixi saabui ra <sup>10</sup> waxati kamali temui. Ala sago findixi yi nan na: A xa se birin malan, naxee na koore a nun naxee na boxi, a xa a xa Mixi Sugandixi findi a birin xunyi ra. <sup>11</sup> Won fan findixi ketongoe ra a tan nan saabui ra, alo Ala a janige tongoxi ki naxe, naxan fe birin nagirima a yete sagoe nun a xa nate ma. <sup>12</sup> Na birin nabaxi ne alako won tan naxee findi mixi singee ra naxee e xaxili ti Ala xa Mixi Sugandixi ra, won xa Ala Nore Kanyi matoxo.

<sup>13</sup> Wo fan to nondi masenxi rame Isa xa fe ra, xibaaru fanyi naxan kisi fi wo ma, wo naxa danxaniya a ma. Isa saabui ra, Ala naxa wo matonxuma a Xaxili Seniyenxi ra alo a laayidi ki naxe. <sup>14</sup> A bara a Xaxili Seniyenxi fi won ma won ke fole ra. A fama won ke donxoe birin fide won ma a na fa a xa mixie foxo ra temui naxe. Yi birin nabaxi ne alako Ala Nore Kanyi xa matoxoe soto.

### *Polu xa Ala maxandi Efeskae be*

<sup>15</sup> Na kui, kafi n a me wo danxaniyaxi Marigi Isa ma ki naxe, wo man seniyentoe birin xanuxi ki naxe, <sup>16</sup> danyi yo mu na n ma tantui ma wo xa fe ra n ne Ala maxandima wo be. <sup>17</sup> N ma

maxandi sigama Baba Ala Nɔɔre Kanyi nan ma, won Marigi Isa naxan batuma, a xa a Xaxili ragoro wo ma naxan fahaamui fima, naxan fee makenenma, alako wo xa Ala kolonyi xun xa masa. <sup>18</sup> N a maxandima wo boɔre xa fe to a fiixe ra alako wo xa kolon soɔo a ma a Ala bara wo xili, fe xa lu wo be wo wo xaxili tima naxan na, alako wo xa kolon soɔo Ala xa ke makaabaxi ma naxan findixi a xa seniyeɔtoe birin gbe ra, <sup>19</sup> alako wo man xa kolon soɔo Ala xa senbe xungbe ma naxan na won tan danxaniyatoe be. Yi senbe findixi Ala xa senbe magaaxuxi nan na, <sup>20</sup> a naxan namini a to a xa Mixi Sugandixi rakeli faxe ma, a a magoro a yirefanyi ma ariyanna. <sup>21</sup> Ala bara mangeya fi a ma naxan dangi mangeya, nɔe, nun senbe birin na. A bara xili fi a ma naxan dangi xili birin na naxan falama yi dunipa ma a nun aligiyama. <sup>22</sup> Ala bara fe birin sa a xa yaamari bun, a man fa a findi fe birin xunyi ra danxaniyatoe jama be. <sup>23</sup> Danxaniyatoe jama fan luxi ne alo Ala xa Mixi Sugandixi fate. Naxan fe birin nakamalima a mooli birin na, a xa fe kamalixi birin na danxaniyatoe jama tagi.

## 2

### *Kisi soɔoma Ala xa hinne nan saabui ra*

<sup>1</sup> Wo fan nu findixi mixi faxaxie nan na wo xa fe kobie nun wo xa yunubie xa fe ra <sup>2</sup> wo nu jereɔma naxee ma. Wo nu biraxi yi dunipa fe kobie nan foɔo ra. Wo nu biraxi Sentane nan foɔo ra, pinne xa mange naxan na kuye ma. Wo nu biraxi a xaxili nan foɔo ra naxan na walife Ala yaxuie tagi. <sup>3</sup> Singe, won birin nu jereɔma na

mooli nan na, won bira won fate waxɔnfe nun won yete xaxili fɔxɔ ra. Na kui, a nu lanma won xa Ala xa xɔnɛ nan tun soto alɔ booree.

<sup>4</sup> Kɔnɔ Ala xa kinikini gbo. A won xanuxi xanunteya tilinxi nan na. <sup>5</sup> Na kui, hali faxamixie nan to nu won na won ma fe kobi rabaxie xa fe ra, Ala naxa won nakeli na faxe ma, won nun a xa Mixi Sugandixi. Wo kisixi Ala xa hinne nan saabui ra. <sup>6</sup> Ala to bara won nakeli faxe ma won nun a xa Mixi Sugandixi ra, a bara won naso ariyanna, a won dɔxɔ a fe ma. <sup>7</sup> A xa fonisireya kui, Ala kisi fixi won ma a xa Mixi Sugandixi Isa nan saabui ra, alako birin xa a xa hinne makaabaxi to waxati birin naxan sa fama.

<sup>8</sup> Wo kisixi Ala xa hinne nan saabui ra, wo xa danxaniya xa fe ra. Kisi mu kelima wo tan xa ma, Ala nan a fima mixi ma. <sup>9</sup> A mu kelima mixi xa wali fanyie xa ma. Na kui, mixi yo mu nɔma a yete matɔxode. <sup>10</sup> Ala xa wali fɔxi nan na won na. Yakɔsi, a bara won daa a xa Mixi Sugandixi Isa saabui ra, alako won xa nu wali fanyie raba, a bara naxee ti won ya i won xa nu jɛrɛ e ma.

*Danxaniyatɛ nama findife Ala xa mixie nun Ala Xaxili sabbatide ra Isa xa sɛrɛxɛ saabui ra*

<sup>11</sup> Na kui, wo xa ratu a Yuwifie mu wo ra bari kepa ma. Naxee xili falama «sunnamixie», e wo fan xili falama «sunnataree». Wo xa a kolon a sunne findixi adama xa wali nan na, naxan nabama mixi fate ra. <sup>12</sup> Wo xa ratu a singe ra wo mu nu Ala xa Mixi Sugandixi xa fe yo kolon. Xɔnɛ nan nu wo ra Isirayilakae ya ma. Laayidi nun saate yo mu nu xirixi wo nun Ala tagi. Xaxili tide yo mu nu na wo yi ra, Ala kolontaree nan nu wo ra dunija ma.

<sup>13</sup> Kɔnɔ yakɔsi, wo tan naxee danxaniyaxi Ala xa Mixi Sugandixi Isa ma, wo tan naxee nu makuyaxi, Ala bara wo maso a ra a xa Mixi Sugandixi wuli saabui ra. <sup>14</sup> A tan nan lanyi rasoxi won tagi, pama firin xa findi keren na. A to a yete fate ba serexe ra, a bara yaxuya tete rabira naxan nu tixi won tagi. <sup>15</sup> A bara Yuwifie xa seriye, e xa yaamarie, nun e xa tonyie senbe kana. A bara na pama firin tongo, a lanyi xiri e tagi, a e findi pama neene keren na a xa yaamari bun ma. <sup>16</sup> A xa faxe saabui ra wuri magalanbuxi ma, a bara e xa yaxuya kana, a e firin birin findi keren na, a lanyi nun bojesa lu e tan nun Ala tagi. <sup>17</sup> A to fa, a naxa wo kawandi lanyi nun bojesa ra, wo tan naxee nu makuya. Naxee fan nu makore, a naxa nee kawandi lanyi nun bojesa ra. <sup>18</sup> A tan nan naade rabixi won firin birin be, won nun Baba Ala xa lu yire keren, a Xaxili Seniyenxi kerenyi saabui ra.

<sup>19</sup> Na kui, wo tan naxee mu nu na Ala xa mixie ya ma, yakosi wo fan bara findi seniyentose ra, wo bara so Ala xa mixie ya ma. <sup>20</sup> Wo bara lu alo banxi tixi naxan bunyi findi xerae nun namiponmese ra. Ala xa Mixi Sugandixi Isa nan findi na banxi geme hagige ra naxan tide gbo a birin be. <sup>21</sup> Banxi yire birin a boore suxuxi a tan nan saabui ra, a ite, a findi horomobanxi seniyenxi ra Marigi be. <sup>22</sup> Isa bara a niya wo fan xa nu malan alo banxi biriki dɔxoma a boore ra ki naxe. Ala na wo tife alo banxi a Xaxili sabatima dennaxe.

### *Ala xa gundo makenenfe*

<sup>1</sup> Na nan a toxi, n Ala maxandima wo be, n tan Pɔlu, naxan bara findi geelimani ra Ala xa Mixi Sugandixi Isa be wo xa fe ra, wo tan naxee mu findixi Isirayilakae ra. <sup>2</sup> N laxi a ra, wo bara a me Ala naxa a xa hinne taxu n na n xa a masen wo be. <sup>3</sup> N jan bara a nde tagi raba, Ala bara a xa gundo masen n be naxan singe nu nɔxunxi. <sup>4</sup> Wo na n ma sebeli xaran, wo noma ne a kolonde a fahaamui bara fi n ma Ala xa Mixi Sugandixi gundo xa fe ra. <sup>5</sup> Yi gundo mu nu makenenxi a singe ra nu adamadie be alo a fa makenenxi Ala xa xera seniyenxie nun namipɔnmee be ki naxe to Ala Xaxili Seniyenxi saabui ra. <sup>6</sup> A bara makenen fa, a si gbeteɛ nun Isirayilakae bara findi pama keren na. E bara findi ke keren tongomae ra. Ala laayidi keren nan tongoxi e birin nalanxi be, Ala xa Mixi Sugandixi Isa xa xibaaru fanyi saabui ra.

<sup>7</sup> Ala to hinnexi n na a senbe birin na, n fan bara findi yi xibaaru fanyi xa walike ra. <sup>8</sup> Hali n to xurunxi dangi seniyentɛ birin na, Ala bara hinne n na. A xa hinne findixi n be yi nan na: N tan xa si birin kawandi Ala xa Mixi Sugandixi xa xibaaru fanyi makaabaxi ra, <sup>9</sup> n xa Ala gundo makenen adamadie birin be, naxan nu nɔxunxi Ala Daali Mange yi ra. Kafi fe fɔlɔ fɔlɛ yi gundo nu nɔxunxi Ala yi, <sup>10</sup> kɔnɔ yakɔsi, a sago na a ra danxaniyatɛ pama xa a xa lonni birin makenen mangɛe nun nolae be naxee na kuye ma. <sup>11</sup> Yi birin findixi Ala xa nate nan na naxan nu na a yi ra abadan. A a birin nakamalixi won Marigi Isa nan saabui ra, a xa Mixi Sugandixi. <sup>12</sup> A tan

saabui ra, won to danxaniyaxi a ma, won noma won makorede Ala ra limaniya kui, siike xanbi. <sup>13</sup> Na kui, n bara wo maxandi limaniya naxa ba wo yi n ma toore kui wo xa fe ra, barima a findima wo be xunnakeli nan na.

<sup>14</sup> Na nan a toxi, n nan n xinbi sinma Baba Ala ya i, <sup>15</sup> bonsoe birin fatanxi naxan na, naxee na koore nun boxi. <sup>16</sup> Na maxandima a xa wo mali a xa noore makaabaxi saabui ra, a xa wo boje senbe so a Xaxili saabui ra. <sup>17</sup> Na maxandima a xa Mixi Sugandixi xa sabati wo boje i danxaniya saabui ra, wo man xa sabati xanunteya kui. Wo xa xanunteya suxu alo wuri bili sanke boxi suxuxi ki naxe. <sup>18</sup> Na maxandima a xa senbe fi wo ma, alako wo nun seniyentoe birin xa no Ala xa Mixi Sugandixi xa xanunteya gboya, a kuyeya, a iteya, nun a tilinyi kolonde wo mabiri. <sup>19</sup> Wo xa kolon soto a ma Ala xa Mixi Sugandixi wo xanuxi ki naxe, xanunteya naxan mu noma fahaamude a gboya xa fe ra, alako Ala xa wo rakamali a xa fe kamalixi birin na.

<sup>20</sup> Matoxoe na Ala be naxan noma fe birin na a senbe saabui ra a naxan fixi wo ma, naxan noma fe birin na, dangi won ma maxandi nun manoxunyi ra <sup>21</sup> Matoxoe na a tan nan be danxaniyatoe nama nun a xa Mixi Sugandixi Isa saabui ra waxati birin, abadan. Amina.

## 4

*Danxaniyatoe jere ki:*

*Nerefe lanyi kui*

<sup>1</sup> Na kui, n tan naxan bara findi geelamani ra Marigi xa fe ra, n bara wo mayandi wo jere ki



xa a masen a Ala nan yati wo xilixi. <sup>2</sup> Wo xa jere yete magore nun boje bexi kui, wo nu dije wo bore be, wo ti wo bore san na xanunteya kui. <sup>3</sup> Wo xa fe birin naba alako lanyi naxa kana wo tagi, Ala Xaxili Seniyenxi naxan fixi wo ma bojesa ra. <sup>4</sup> Won findixi fate keren nan na. Ala Xaxili Seniyenxi keren nan a ra. Ala wo fan xilixi ne wo xa wo xaxili ti fe keren nan na. <sup>5</sup> Marigi keren, danxaniya keren, nun xunxa keren nan na won be. <sup>6</sup> Ala keren nan na won be naxan findixi birin Baba ra, naxan na birin xun ma, naxan walima birin saabui ra, naxan na birin i.

<sup>7</sup> Kono hinne fixi kankan ma won ya ma alo Ala xa Mixi Sugandixi a xasabixi ki naxe. <sup>8</sup> Na nan a toxi a sebexi,  
«A to te koore,  
a naxa a yaxuie suxu,  
a naxa adamadie ki.»

<sup>9</sup> A to sebexi, «A bara te,» na nan na ki a bara goro han boxi ma sinden, beenun a man xa te.

<sup>10</sup> Naxan goro, na nan man texi koore birin xun ma, alako a xa fe birin nakamali. <sup>11</sup> A adamadie ki naxan na, a findi yi nan na: ndee xa findi xerae ra, ndee xa findi namijonmee ra, ndee xa findi xibaaru fanyi kawandilae ra, ndee xa findi danxaniyatoe xunmatie nun karamoxoe ra. <sup>12</sup> A won kixi ne na birin na alako won xa seniyentoe mali e xa fata Ala xa Mixi Sugandixi xa danxaniyatoe nama raperede yare. <sup>13</sup> Won xa bira na foxo ra han won birin xa lu lanyi kui naxan kelima danxaniya nun Ala xa Di kolonfe ma, han won birin xa kamali alo Ala xa Mixi Sugandixi kamalixi ki naxe. <sup>14</sup> Na temui won

mu luma sɔnɔn alɔ diyɔrɛɛ. Won mu lintanma sɔnɔn alɔ wuri naxan saxi ye fari, mɔrɔnyi nun foye naxan tutunma, e a xanin yire birin. Na kui, mixie mu nɔma won natantande sɔnɔn e xa wule kawandi ra, e xa kɔɔta, nun e xa yanfanteya ra. <sup>15</sup> Won xa nɔndi nan fala xanunteya kui. Fe birin kui, won xa danxaniya Ala xa Mixi Sugandixi ma, naxan findixi danxaniyatɔɛ pama xunyi ra. Won xa mɔ na danxaniya kui. <sup>16</sup> Xunyi nan fate salonse birin naɲɛrɛma. Kankan xirixi a boore ra, kankan a xa wali rabama, alako fate birin xa mɔ, a xa senbe sɔtɔ xanunteya kui.

*Nɛrɛfɛ lahalɛ nɛɛnɛ ma, tinxinyi nun seniyenyi kui*

<sup>17</sup> Na kui, n yi nan falama wo be, n man xa a mabanban Marigi xili ra: Wo naxa ɲɛrɛ sɔnɔn alɔ danxaniyataree ɲɛrɛma ki naxɛ. E xaxilie birama fe fufafu nan tun fɔxɔ ra. <sup>18</sup> E xaxilie ifɔɔrɔxi. E xa fe kolontareya nun e xa sondon xɔrɔxɔya bara a niya e xa gan Ala xa kisi ra. <sup>19</sup> E mu yaagima fefe ma sɔnɔn. E bara e yetɛ rabolo langoɛɲa xili ma. E mu wasama fe kobi mɔɔli birin nabafe ra.

<sup>20</sup> Kɔnɔ Ala xa Mixi Sugandixi mu wo tixi na kira xa xɔn! <sup>21</sup> Wo a xa fe mexi nɛ, wo man bara xaran a xa fe ra. Wo a kolon yati a nɔndi na Isa nan yi. <sup>22</sup> Wo tinkanxi nɛ wo xa wo yi ba wo ɲɛrɛ ki fori ra, naxan wo xun nakanama wo waxɔnfe kobi saabui ra. <sup>23</sup> Wo bɔɲɛ nun wo xaxili xa mafindi bɔɲɛ nɛɛnɛ nun xaxili nɛɛnɛ ra. <sup>24</sup> Wo xa wo lahalɛ fori masara a nɛɛnɛ ra. Wo luma nɛ alɔ wo bara findi mixi nɛɛnɛ ra Ala naxan daaxi a xa ɲɛrɛ a xa tinxinyi nun seniyenyi yati kui.

<sup>25</sup> Na kui, won xa wule lu, won xa nɔndi nan fala won bore bɛ, barima won findixi fate keren salonyie nan na. <sup>26</sup> Xa wo xɔnɔ, wo naxa yunubi raba. Wo naxa a lu soge xa dula xɔnɛ na wo bɔɲɛ kui, <sup>27</sup> alako wo naxa santide lu Ibulisa bɛ. <sup>28</sup> Muɲɛti xa muɲɛ lu. A xa wali tinxinyi kui alako a xa munafanyi sɔtɔ a naxan fima setaree ma. <sup>29</sup> Wo naxa a lu wɔyɛn kobi yo xa mini wo dɛ i. Wo xa wɔyɛn fanyi nan fala naxan nɔma mixi malide a hayi ki ma, alako wo xa wɔyɛnyi xa findi hinne ra e bɛ. <sup>30</sup> Wo naxa Ala Xaxili Seniyenxi tɔɔɔ, Ala wo matɔnxumaxi naxan na han a fama won fɔxɔ ra lɔxɔ naxɛ. <sup>31</sup> Wo xa wo yi ba yi fe mɔɔli birin na: xɔnɛ, bɔɲɛte, ɲaaxɔna, ɲɔxɔnsɔsɔɛ, konbi, a nun fe kobi mɔɔli birin. <sup>32</sup> Wo xa marafanyi nun bɔɲɛ fanyi masen wo bore bɛ. Wo xa diɲɛ wo bore ma alɔ Ala diɲɛxi wo fan ma ki naxɛ a xa Mixi Sugandixi saabui ra.

## 5

### *Ɗerefe naiyalanyi kui*

<sup>1</sup> Na kui, wo to bara findi Ala xa di xanuxie ra, wo xa a fɔxi nan naba. <sup>2</sup> Wo xa ɲere xanunteya kui alɔ Ala xa Mixi Sugandixi won xanuxi ki naxɛ, a a yetɛ fi won ma fe ra, a findi won ma serɛxɛ ra naxan labunde xiri rafan Ala ma.

<sup>3</sup> Kɔnɔ langoɛna, mile, nun seniyentareɲa mɔɔli yo naxa lu wo yi ra. E xa fe ɲan naxa fala wo tagi, barima na mu lan seniyentɔɛɛ ya ma. <sup>4</sup> Wɔyɛnyi masuturatate, daxɔna wɔyɛnyi, wɔyɛn ɲaaxi, e sese naxa mɛ wo tagi. Na mu lan. Wo xa nu tantu wɔyɛnyi nan fala wo bore tagi.

<sup>5</sup> Wo xa a kolon a fanyi ra, a langoe, seniyentare, a nun milante (naxan maniya kuye batui ra), e sese mu findixi ke tongoma ra Ala nun a xa Mixi Sugandixi xa mangeya niini bun ma. <sup>6</sup> Wo naxa a lu mixi yo xa wo madaxu woyenyi fufafu ra. Yi yunubi moolie xa fe ra, Ala xa xone goroma ne mixie ma naxee mu a xui suxuma. <sup>7</sup> Na kui, wo naxa gbaku e ra.

<sup>8</sup> Singe, dimi nan nu wo ra, kono yakosi, wo bara findi naiyalanyi ra Marigi saabui ra. Wo xa wo jere alo a lan naiyalanyi xa die xa e jere ki naxe. <sup>9</sup> Naiyalanyi xa wali toma fe fanyi birin, tinxinyi birin, nun nondi birin kui. <sup>10</sup> Wo xa kata wo xa kolon soto fee ma naxee Ala kenexi. <sup>11</sup> Wo naxa wo gbe raso dimi xa wali kobi ya ma feo! Wo xa na fe mooli ramini kene ma. <sup>12</sup> Barima na mixi moolie fe naxee rabama noxunyi kui, hali a ifalafe yete mayaagi. <sup>13</sup> Kono naiyalanyi fe naxan birin makenema, a toma ne ya ra. <sup>14</sup> Fe naxan birin toma ya ra, a fan bara findi naiyalanyi ra. A falaxi na nan ma, «I tan naxan xife, xunu.

Keli faxamixie ya ma,

Ala xa Mixi Sugandixi xa yanbe xa ti i ma.»

<sup>15</sup> Na kui, wo mēeni wo jere ki ma. Wo naxa wo jere alo xaxilitaree. Wo xa wo jere ne alo xaxilimae. <sup>16</sup> Wo mēeni yi temui ma, barima yi temui mu fan. <sup>17</sup> Na na a ra, a mu lan wo xa wo jere alo xaxilitare. Wo xa kolon soto Marigi waxonfe ma. <sup>18</sup> Weni naxa wo rasiisi, barima xaxilitareja nan na ki. Wo xa kamali Ala Xaxili Seniyenxi nan na. <sup>19</sup> Wo xa woyen wo bore be suuki nun beeti ra. Wo xa suukie nun beetie ba

Marigi be naxee kelima wo boŋe yati yati ma.  
<sup>20</sup> Wo xa tantui rasiga Baba Ala ma fe birin xa fe ra, temui birin. Wo xa na raba Ala xa Mixi Sugandixi Marigi Isa xili saabui ra.

*Nerefe yete magore kui*

<sup>21</sup> Wo xa wo yete magoro wo bore be Ala xa Mixi Sugandixi xa yaragaaxui kui.

<sup>22</sup> Ginee, wo xa wo yete magoro wo xa morie be, alo wo wo yete magoroma Marigi be ki naxe.

<sup>23</sup> Xeme findixi a xa gine xunyi nan na, alo Ala xa Mixi Sugandixi findixi danxaniyatoe pama xunyi ra ki naxe. Danxaniyatoe pama fan findixi a fate nan na, a bara naxan nakisi. <sup>24</sup> Danxaniyatoe pama a yete magoroma Ala xa Mixi Sugandixi be ki naxe, ginee fan lanma e xa e yete magoro e xa morie be na ki ne fe birin kui.

<sup>25</sup> Xeme, wo xa wo xa ginee xanu alo Ala xa Mixi Sugandixi danxaniyatoe pama xanuxi ki naxe. A a yete fi danxaniyatoe pama xa fe ra

<sup>26</sup> alako a xa a raseniyeŋ, a xa a rafixe ye ra masenyi saabui ra, <sup>27</sup> a xa a dentege a yete be

nore kui. Na kui, danxaniyatoe pama luma ne alo dugi tofanyi, xosi yo mu na naxan ma, naxan mu matoreŋoxi. A xa seniyeŋ, tantanyi yo naxa lu a ma. <sup>28</sup> Xeme lanma e xa e xa ginee xanu

na mooli nan na. E xa e xanu alo e e yete fate xanuxi ki naxe. Naxan a xa gine xanuma, a a yete nan xanuxi. <sup>29</sup> Mixi yo mu na naxan a yete

fate xonma, barima mixi birin a yete rabaloma, a meeni a yete fate ma. Ala xa Mixi Sugandixi fan meenima danxaniyatoe pama ma na ki ne,

<sup>30</sup> barima won findixi a fate salonyie nan na.

<sup>31</sup> «Na kui, xεμε fama ne kelide a baba nun a nga xun ma, a a maso a xa gine ra, e findi fate keren na.» <sup>32</sup> Gundo belebele nan na ki, kɔnɔ n na Ala xa Mixi Sugandixi nun danxaniyatɔe pama nan ma fe falafe. <sup>33</sup> Kɔnɔ kankan xa a xa gine xanu alɔ a yete yati. Gine fan lanma a xa a xa mɔri binya.

## 6

<sup>1</sup> Die, wo xa wo nga nun wo baba binya Marigi xa fe ra, barima na nan findi fe tinxixi ra.

<sup>2</sup> Yaamari singe nan ya, barake laayidixi naxan xanbi ra: «I xa i nga nun i baba binya, <sup>3</sup> alako fee xa sɔɔneya i be, i xa simaya sɔɔ dunija bende fupi fari.»

<sup>4</sup> Babae, wo fan naxa wo xa die raxɔnɔ. Wo xa e xuru, wo e rasi alɔ Marigi wama a xɔn ma ki naxe.

<sup>5</sup> Konyie, wo xa wo marigie sago raba, naxee na wo xun ma yi dunija ma. Wo xa e binya, wo gaaxu e ya ra. Wo xa e sago raba wo nii ra, alɔ wo Ala xa Mixi Sugandixi sago rabama ki naxe.

<sup>6</sup> Wo naxa a raba e ya tode gbansan xa ra, alɔ naxee katama e yete rafande mixi ma. Wo xa a raba ne alɔ Ala xa Mixi Sugandixi xa konyie naxee Ala sago rabama e bɔɔne birin na. <sup>7</sup> Wo a raba wo tinxi ra. Wo naxa wali e be alɔ wo na walife e tan gbansan nan ma fe ra. Wo xa wali ne alɔ wo na walife Marigi nan be, <sup>8</sup> barima wo a kolon, mixi fe fanyi yo raba, xa a findi konyi ra, xa a findi xɔre ra, Marigi a sare fima ne.

<sup>9</sup> Konyi marigie, wo fan xa a raba na ki ne wo xa konyie be. Wo xa ba xaɔɔefe e ma, barima wo

a kolon Marigi keren nan na wo birin be koore ma, naxan mu mixi yo rafisa a boore be.

*Ala geresose naxee fima danxaniyatɔɛ ma*

<sup>10</sup> A dɔnxɔɛ ra, wo xa wo senbe so Marigi saabui ra nun a xa senbe magaaxuxi saabui ra.

<sup>11</sup> Wo xa Ala xa geresose birin tongo, alako wo xa nɔ tide Ibulisa xa kɔɔta birin kanke. <sup>12</sup> Barima won mu na ibunadama xa gerefe. Mangɛɛ, nɔlae, yi duniɲa senbema ɲaaxie, ɲinne naxee na kuye ma, gere na won nun nee nan birin tagi.

<sup>13</sup> Na nan a ra, wo xa Ala xa geresose birin tongo alako na lɔxɔɛ kobi na a li, wo xa nɔ tide. Na gere rapɔnyɪ xa wo li wo tixi. <sup>14</sup> Na kui, wo xa ti nɛ. Wo wo tagi ixiri nɔndi ra. Wo tinxinyi findi wo kanke makantase ra. <sup>15</sup> Wakilife xibaaru fanyi masende naxan bɔɲesa fima mixi ma, wo xa na findi sankiri ra wo sanyie be. <sup>16</sup> Safe na birin xun ma, wo xa danxaniya suxu wo yi ra alɔ wure lefa. Na nan nɔma Sentanɛ xa tanbe radɛxɛxie ratide, a e raxuben. <sup>17</sup> Wo man xa kisi suxu naxan findixi wo xun makantase ra. Wo Ala Xaxili Seniyenxi xa santidegema fan suxu naxan findixi Ala xa masenyi ra. <sup>18</sup> Wo xa Ala maxandi temui birin a Xaxili Seniyenxi saabui ra, duba nun maxandi mɔɔli birin na. Na kui, wo naxa yanfa. Wo xa wo tun nabɛxi nɛ Ala maxandife ra seniyentɔɛ birin be.

<sup>19</sup> Wo xa Ala maxandi n fan be, alako n na n dɛ ibi, Ala xa n mali a xa xibaaru fanyi gundo makenende birin be limaniya ra. <sup>20</sup> N findixi Ala xa santigi nan na yɔlɔnxɔnyɪ bara balan naxan ma na xibaaru fanyi xa fe ra. Wo xa Ala maxandi

n be alako n xa a masen limaniya ra alo n lan n xa a masen ki naxe.

*Woyen donxe*

<sup>21</sup> Tikike n ma fe nun n ma wali xa fe birin masenma ne wo be. Won ngaxakerenyi xanuxi nan a ra danxaniya kui. Tunnabexila nan a ra Marigi xa wali kui. <sup>22</sup> N a xexxi wo ma na nan ma, alako a xa muxu xa fe tagi raba wo be, a man xa wo bope ralimaniya.

<sup>23</sup> Baba Ala nun a xa Mixi Sugandixi Marigi Isa xa bope, xanunteya, nun danxaniya fi ngaxakerenyie ma. <sup>24</sup> Ala xa hinne fi birin ma Marigi Isa xa xanunteya mu jonma mixi naxee be.



**Soso Kitaabuie: Tawureta, Yabura, Inyila**  
**The Holy Bible in the Susu language of Guinea (Soso**  
**Kitaabuie: Tawureta, Yabura, Inyila Bible)**

copyright © 2015 Mission Évangélique Réformée Néerlandaise et les  
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative  
Commons Attribution-Noncommercial-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2020-11-11

---

PDF generated using Haiola and XeLaTeX on 22 Feb 2024 from source  
files dated 29 Jan 2022

f1d08866-ea3e-5b9b-b506-e7690c5c61d2